



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyon nga Waray
Tuig XXXVII Ihap 10
Mayo 21, 2006
www.philippinerevolution.org

Editorial

Madugo nga panginintriga, madugo nga panmumuyyoy

Malisyoso ngan mapan-uwat an mando ni Gloria Arroyo ha pulisya nga imbestigahan kunuhay an magkasurunod nga pagsikmit ngan panmatay ha mga makamasa nga personahe, lider ngan membro han mga progresibo nga partido ngan organisasyon.

Syempre palabas la ini nga imbestigasyon. Naobligar hi Arroyo nga maghimo hin pakitang-tao nga pitad atubangan han hiluagan nga pagkondenar ha militar ngan ha iya rehimen nga asya an tinuod nga utok ha luyo han waray hunong nga kabangis kontra ha katawhan ngan ira mga progresibo nga pwersa.

Kabakyang han pitad nga "imbestigasyon," nagpapasarang an Malakanyang hin usa nga dako nga buwa: nga an mga biktima han kabangis han rehimen Arroyo, in mga biktima kuno han "pagpupurga" ha ranggo han PKP ngan BHB, ngan gindududahan kuno nga ahente han gobyerno. Kasunod hini, ginsesering nira nga hi Arroyo ngan "duha nga namumuno nga opisyal han Malakanyang nga gin-ngangaranan hin Gonzalez" an target patayon han BHB. Waray pa makontento hini nga mga buwa, igin-

dugang pa nira nga igsusunod na liwat ha mga papatayon an pira nga lider han pampolitika nga oposisyon.

Ungod gud man nga nahingadto na ha pagtatahi hin pantasya an Malakanyang ha desperasyon hini nga tahuban an kamatuoran ngan limpyuhan an kalugaringon ha responsabilidad hini ha panmatay ha gatus-gatos nga progresibo nga aktibista. Malisyoso nga iginbutang-butang ini ha PKP ngan BHB ha katuyuanan nga magsabrag hin intriga ngan pakarauton an rebolusyunaryo nga kagiusan. Gintatalinguha hini nga buhagon an ranggo han nagkakaurusa nga prente nga kontra-Arroyo ngan paluyahon an kagiusan masa nga nagsusulong han pagpabagsak han Arroyo nga rehimen. Ka-

ruyag liwat hini tarhugon ngan maikondisyon an katawhan para ha mas magbangis pa nga panmumuyyoy.

Kaparte han madugo nga panginintriga han rehimen Arroyo an pirit nga pagdadabi ha unom nga representante han mga progresibo nga partido ha Kongreso ha mga kaso hin pagpatay ngan pagsikmit. Nabibirikis man an lohika ngan kulang hin basaranan, pirit nga ginpapagawas



Mga landaw hini nga isyu...

10 armas, nakumpiska ha Leyte ngan Samar
PAYPAY 7

Interbyu kan Jorge "Ka Oris" Madlos
PAYPAY 8

Daniel Boone Schirmer, 91
PAYPAY 11

nga an mga biktima nga organisasyon an aada ha luyo han pagpatay ha kalugaringon hini nga mga lider.

Labot ha pagdabihan han presente nga mga panmatay, plano liwat ni Justice Sec. Raul Gonzalez ig-among an unom nga progresibo nga magbalaralud ha pagpatay ha mga gindududahan nga impiltrador ha rebolusyunaryo nga kagiusan hadton dekada 1980. Ha sugad dudugangan han tinuha-tuha nga ebidensya an hinimuhimo nga kaso hin rebelyon kontra ha ira nga pirit nagdadabi ha ira ha PKP ngan BHB ngan ha pakikigkonsabo kuno hini ha mga rebelde nga militar agud maglansar hin kudeta.

Kadungan han madugo nga panginintriga, ginpapakusog pa han ipokrito ngan nagpapaka-lirulimpyo nga rehimen an madugo nga paglanat ha mga progresibo nga pwersa. Ha yana 585 na nga mga lider ngan membro han progresibo nga partido ngan organisasyon an nagin biktima han mga *death squad* tikang makalingkod hi Arroyo ha poder hadton 2001. Nagpatikang na liwat an operasyon han mga *death squad* ha Metro Manila ngan usa na nga membro han Bayan Muna ha Makati City an syahan nga biktima.

Nakasarang an mga *death squad* ni Arroyo ha magkalain-lain nga yunit

han AFP ngan aada hira ha kumandhan mga lanong nga pasista nga opisyal nga pinakatangkod liwat kan Arroyo—pareho kan Maj. Gen. Jovito Palparan. Kilalado ini ha sakob han AFP komo “black army.” Ha Malakanyang, an direkta nga nagdudumara hini ngatanan waray iba kundi hi Norberto Gonzales ngan an ginpapamunuan niya nga Cabinet Oversight Committee on Internal Security (COC-IS).

Ginlalauman han rehimen nga pinaagi hini mapapaluya o kun diri man marurumok an mga pwersa nga pina-kaaktibo nga naato kan Arroyo. Mis-mo an pinuno nga berdugo han rehimen nga hi General Palparan an nagsering nga an mga namamatay nga diri armado nga aktibista amo in “collateral damage” o mga diri malilikyan nga kaswalti kasagubay han mas dako ngan maihaan nga katuyuanan nga puypuyon an rebolusyunaryo nga armado nga kagiusan.


Nagsasayop uga-ring an rehimen ha paghuna-huna nga pina-agi hini nga mga pasista nga atake marurumok an rebolusyunaryo nga kagiusan ngan matatarhug ngan mapapaluya

an dayag ngan ligal nga kagiusan nga kontra-Arroyo. An waray wantas nga panmatay ha mga progresibo nga pwersa ngan an kontra-komunista nga pagpapakaraut in desperado nga pitad han usa nga rehimen nga ura-ura na nga nahimumulag tungod ha padayon nga pagkakabuyagyag han mga pasista nga krimen hini, han luon-luon nga mga kaso hin korapsyon ngan panlimbong ha eleksyon ngan damo nga iba pa nga krimen ha katawhan ngan ha nasud.

Kabaliskaran ha ginlalauman hini, dugang la nga nabubuksas an pagin mapanmuyop ngan brutalidad han rehimen ngan dugang nga nagtitikakusog ngan naghihuluag an kangkalas han katawhan. Padayon nga naato an mga lider, organisasyon ngan pwersa nga gintatalinguha nga tarhugon han rehimen. Nagtitikadamo an karuyag mag-arms kontra ha gobyerno Arroyo ngan mas nagtitikadako ngan nagkukusog an armado nga rebolusyunaryo nga kagiusan. Iginpapakita la han mga panmatay ngan pasista nga kabangis han rehimen Arroyo an katukmaan ngan panginahanglan nga atuhan ngan tapuson na ini nga makangangalas nga rehimen.

Urog pa nga nanluluya an rehimen ha atubangan han pagkusog han mga taktikal nga opensiba han BHB, paghiluag han kagiusan ngan nagkaurusa nga prente nga kontra-Arroyo, mga paggios ha kakalsadahan ngan iba pa nga pampolitika nga aksyon han mga pwersa nga kontra-Arroyo. Bisan ha ranggo han armado nga pwersa nga nagseserbe nga prinsipal nga sinasarigan han rehimen, naghihuluag an pagkadisgusto ngan nagtitikadamo an andam magbul-iw hin suporta ha rehimen ngan direkta nga umato agud masaliwnan ini.

Diri mag-iiha, an kabug-aton han mga sala han rehimen Arroyo ngan an makusog nga hingyap han katawhan nga kab-uton an hustisya amo an magpapabagsak hini. **AB**



Tuig XXXVII Ihap 10 Mayo 21, 2006

Igin-gagawas an *Ang Bayan* ha yinaknan nga Pilipino, Bisaya, Iloko, Hiligaynon, Waray ngan Ingles.

Mahihimo ini nga i-download tikang ha Philippine Revolution Web Central nga makikita ha:

www.philippinerevolution.org

Nakarawat an *Ang Bayan* hin mga kontribusyon ha porma hin mga artikulo ngan balita. Gin-aaghat liwat an mga mambarasa nga magpaabot hin mga suson ngan rekomendasyon ha ikauuswag han aton pahayagan. Maa-abot kami pinaagi han mga email ha: angbayan@yahoo.com

Gin-uunod

Editorial

Madugo nga panginintriga, madugo nga panmumuyop	1
Padayon nga panmatay ngan pansikmit	3
Pan-gigipit ha Batasan 6	4
Nagdadamong mga ulang ha cha-cha	5
Arroyo, salaang—CCTA	6
Arroyo, ginkondenar han CBCP	6
Magdinaugon nga TO	7
2 M16 nakumpiska ha Negros	
10 armas, nakumpiska ha Leyte ug Samar	
Ambus ha Isabela	
Interbyu kan Ka Oris	8
Pag-ato ha NEMR	9
Daniel Schirmer, 91	11
Pangengespiya han US ha Pilipinas	12
Balita	14

Iginpublikar an *Ang Bayan* duha kabeses kada bulan han Komite Sentral han Partido Komunista han Pilipinas

Padayon nga panmatay ngan pansikmit

Padayon nga nagtitikahilaba an listahan han mga magpakangingirhat nga krimen han rehimen Arroyo kontra ha katawhan. Sakob la hin napulo kaadlaw, upat an ginpatay, usa an gin-atentaran patayon ngan duha an ginsikmit nga mga membro ngan lider han mga progresibo nga organisasyon. Biktima liwat hin panmatay an iba pa nga grupo nga kontra-Arroyo.


Gin-ambus hin mga nakamotor-siklo nga lalake an magbugto nga Jose Doton, 62 ngan Diosdado Doton, 57, ha Camangaan, San Nicolas, Pangasinan hadton Mayo 16. Dayon nga namatay hi Jose samtang aada ha kritikal nga kamutangan yana hi Diosdado. Hi Jose an natindog nga *secretary general* han Bagong Alyansang Makabayan (BAYAN)-Pangasinan ngan presidente han Tignay dagiti Mannalon a Mangwayawaya ti Agno (TIMMAWA) nga aktibo ha pagkontra ha San Roque Dam ngan direkta nga nana-nawagan para ha pagpapatal-sik kan Gloria Arroyo. Sigon kan Roman Polintan, *secretary general* han BAYAN-Central Luzon, hi Doton an ika-27 nga kaapi han BAYAN nga ginpatay ha rehiyon yana nga tuig.

Ha Metro Manila, ginsikmit han mga armado nga lalake hini nga Mayo 16 hi Roland Ralla Porter han Bayan Muna atubangan han usa nga tindahan ha Makati City. Sigon ha mga nakakita, pirit hiya nga iginsakay ha usa nga *van* hin mga nagpakilala nga pulis. Ngada yana waray pa hiya igpakita. Hi Porter an ika-15 nga aktibista nga ginsikmit hini nga tuig ngan ika-148 tikang lumingkod hi Arroyo ha poder hadton 2001.

Tulo kaadlaw antes ini, ginpusil tubtub nga namatay hi Manuel Nardo, Bayan Muna (BM) *coordinator* ha Barangay Quebiawan, City of San Fernando, Pampanga. Nakaraptay na pero tulo pa kabeses nga ginpusil hi Nardo ha

tiyan. Namalagiw an mga kriminal sakay hin usa nga motorsiklo.

Ginpusil liwat tubtub nga namatay an mag-asawa nga Elena "Baby" Mendiola, 54, ngan Ricardo Balauag, 61 ha Barangay Garit Sur, Echague, Isabela hadton Mayo 10. Hi Mendiola an *secretary general* han BM Isabela samtang aktibo nga kaapi han BM an iya asawa. Diri ini an syahan nga higayon nga gin-ambus hi Mendiola han mga *death squad* ni Arroyo. Syahan nga gin-atentaran an iya kinabuhi hadton Marso 11.



Gin-ambus liwat ha Oroquieta City, Misamis Occidental an mag-asawa nga pastor nga hira Rev. Jeremias Tinambacan ngan Rev. Marilou Tinambacan hadton Mayo 9. Dayon nga

namatay hi Jeremias samtang aada ha kritikal nga kondisyon an iya asawa. Hi Jeremias an tsirman han Bayan Muna-Misamis Occidental ngan mga pastor ini nga mag-asawa han United Church of Christ in the Philippines. Sigon kan Marilou, usa ha mga nag-ambus ha ira hi Mamay Guimalan, usa nga ahente han AFP *intelligence*.

Tikang mangatungdanan hi Arroyo hadton 2001, naabot na ha 585 an ginpatay nga mga lider ngan kaapi han mga progresibo nga organisasyon. Saysenta y syete ha ira an ginpatay tikang Enero 2006.

Sigon liwat ha imbestigasyon nga ginhimo han International Labor Solidarity Movement (ILSM) hini nga Mayo 2-6, "sistematiko ngan samwak" an mga pagtalapas ha tawhanon nga katungod ngan katungod han trabahador ilarum han rehimen Arroyo. Kalakip han mga ginkondenar han ILSM an pagmasaker ha Hacienda Luisita, an panmatay ha mga aktibista nga trabahador ngan parag-uma ngan mga kaso hin pansikmit ngan harasment.

Gintudlok han ILSM nga utok han mga pagtalapas ha tawhanon nga katungod hi Gloria Arroyo ngan mga niyu-tiyo niya. Nahirekord an 874 nga kaso hin pagtalapas ha tawhanon nga katungod nga nagbiktima hin 99,011 nga indibidwal, 14,302 nga pamilya ngan 288 nga komunidad hadton 2005.

Samtang, nagtitikadamo na liwat an mga nahirereport nga panmatay ha mga lider ngan membro han iba pa nga mga organisasyon nga kontra-Arroyo.

Ginpusil hini nga Mayo 18 ha Balanga, Bataan hi Anna Gandia, organisador han kababayin-an. Antes ini, ginpatay liwat ha Bataan an maslider nga hi Irma "Cathy" Alcantara ngan lider-kabatan-unan nga hi Audie Lucero.

Ha Davao del Norte, ginpatay an lider parag-uma nga hi Eric Cabanit ha Panabo City hadton Abril 24.

Ha Negros, upat na nga lider parag-uma an ginpatay tikang Marso tubtub Mayo. Ginpusil hini nga Mayo 17 ha La Castellana, Negros Occidental hi Mario Domingo. Ginpatay liwat hadton Abril 22 ha Kabankalan, Negros Occidental hi Porfirio Maglasang. Antes ini, ginpatay hi Rico Adeva ha Silay City, Negros Occidental hadton Abril 15. Ginpusil naman hadton Marso 27 ha Tanjay City, Negros Oriental hi Vicente Denila. AB

Padayon an pan-gigipit ha "Batasan 6"

Ginawas na ha bilding ngan proteksyon han House of Representatives hadton Mayo 8 an lima nga kongresista nga ginbansagan nga "Batasan 5" (Cong. Satur Ocampo, Joel Virador ngan Teddy Casiño han Bayan Muna, Rafael Mariano han Anakpawis ngan Liza Maza han Gabriela Women's Party) kahuman han sobra duha kabulan nga pagtago didto agud malikyan an tarhug han rehimen Arroyo hin pag-aresto nga waray mandamyento.

Napiritan hi Justice Secretary Raul Gonzalez nga bawion an tarhug kahuman ibasura han Makati Regional Trial Court an pitad han Department of Justice (DOJ) nga ig-upod hira ngan sobra 40 nga iba pa ha kaso nga rebelyon nga nahuuna nga iginsalawad kontra ha gin-aresto na nga hira Anakpawis Cong. Crispin "Ka Bel" Beltran ngan 1st Lt. Lawrence San Juan.

Gintapo an Batasan 5 hin sobra usa kayukot nga tagsuporta ngan kasangkayan ha gawas han Batasan ngan tikang dida nagpakadto hira ha University of the Philippines ha Diliman agud igpadayon pareho an selebrasyon han ira kadaugan ngan an ira utro nga pag-api ha mga protesta ha kalsada ngan iba pa nga paggios kontra ha rehimen.

Giklaruhi ha ngatanan nga waray hunong an pagpupursige han rehimen nga kasuhan, arestuhon ngan gipiton an lima nga progresibo nga magbaralaud. Pira pala kadlaw pagkagawas nira ha Batasan Complex, utro nga iginsalawad han DOJ an kaso kontra ha ira ngan kan Lieutenant San Juan ha Makati Regional Trial Court ha ilarum na han iba nga huwes.

Malinaw nga waray pa gihapon madig-on nga basaranan an utro nga iginsalawad nga kaso nga basar la ha ginbirikis nga mga estorya nga ginlakipan hin mga bag-o nga hinimu-himo nga ebidensya. Pirit nga ginpapagawas han DOJ nga may di-



rekta nga sumpay an lima nga magbaralaud ha armado nga kagiusan ngan bisan ha paglalansar kuno hin kudeta kontra ha rehimen. Kadungan hini, padayon liwat an mga pagpapakaraut ngan paglalarang kontra ha ira han mga pinuno nga pasista han Malakanyang nga hira National Security Adviser Norberto Gonzales ngan Justice Secretary Raul Gonzalez.

Bag-o nga Larang

Pinakabag-o nga larang ni Norberto Gonzales an plano nga pagdabi ha mga progresibo nga kongresista ha ginpapalano kuno nga asasinasyon han BHB kan Gloria Arroyo, pira nga membro han iya kabinete ngan pira nga personalidad ha ligal nga oposis-

yon. Karuyag han Malakanyang nga gamiton para hini hi Philip Limjoco, nga ginsikmit han AFP Intelligence ha Dau, Mabalacat, Pampanga hadton Mayo 7. Usa ha sobra 40 katawo nga ginkasuhan han hinimu-himo nga kaso nga rebelyon hi Limjoco kaupod an Batasan 5 nga gin-akusaran han militar nga membro han BHB. Posible nga igpresentar hiya komo operatiba han BHB nga ginmanduhan nga maghimo ha gin-ininup-inop nga larang nga asasinasyon nga ginsesering ni Gonzales. Ha sugad mahikakarga liwat han rehimen ha mga kaso nga iginsalawad kontra ha mga progresibo nga magbaralaud an tinuha-tuha nga plano nga asasinasyon.

Ha presente katin han mga operatiba han Intelligence Security Unit han AFP hi Limjoco ngan gindidid-an nga makasumpay ha iya pamilya ngan mga abogado. Posible nga ipakita hiya ha tiarabot komo "pamatuod" ha plano kuno nga asasinasyon agud mahiduon an Batasan 5.

Ha atubangan hini ngatanan, dugang nga nagtitikahiluag an mga panawagan kontra han pan-gigipit ha mga representante han mga progresibo nga partido. Tikang ha magkalin-lain nga organisasyon ngan institusyon ha sakob ngan gawas han nasud nga nag-uundong han hustisya, demokrasya, katungod-pantawo, mga katungod ha parlamento ngan iba pa nga sibil nga katungod, nabuklos an mga pagkondenar ha pan-gigipit ha unom nga progresibo nga magbaralaud. Kaupod dinhi an Inter-Parliamentary Union (IPU) nga nanawagan ha rehimen Arroyo hini nga Mayo 12 nga buhian na hi Ka Bel. ■

Nagdadamu nga mga ulang ha cha-cha

Nagtitikagrabe an desperasyon han Malakanyang ha atubangan han nagtitikadamo nga ulang ha pagsusulong hini han “cha-cha” o “charter change.” Kinukurian gud ini nga birikan an pagdumiri han dako nga mayoriya han mga senador ha iginpipirit hini nga pagtitimpo han Senado ngan Kongreso komo Constituent Assembly. Ha luyo naman nga bahin, gihiluagi an pagriwa ngan ligal nga ulang ha “people’s initiative” komo ikaduha nga pamaagi han rehimen para bag-uhon an bataan balaud.

Desperado an rehimen nga mahipatuman an “cha-cha” pag-abot han Hulyo agud idiskaril an pagsasalawad utro han kaso nga *impeachment* kontra kan Arroyo ha pag-aabri han Kongreso ha Hulyo. Ginproybahan hini nga kombinsihon an mga senador nga tumambong ha iginpatawag hini nga miting han Legislative Executive Development Advisory Council (LEDAC) hadton Mayo 16 nga gintambungan liwat ni Arroyo, mga membro han kabinete ngan mga kongresista. Pero waray nakab-ot dinhi gawas ha panaad nga maghimo hin dayalogo kasumpay han “cha-cha”.

Pero antes pa man hini, diri mapungnan an pakarautay han mga senador ngan kongresista. Diri nababantad an tindog han dako nga mayoriya han mga senador nga iligal an proposisyon nga pagtutukod hin *constituent assembly*. Igin-iinsister han mga senador nga an mga pagbabag-o ha konstitusyon poyde mahimo ha pamaagi nga pareho han paghimo hin bag-o nga balaud (*legislated amendment*) ngan manginginahanglan hin $\frac{3}{4}$ nga botos han kada lawas. Karuyag sidngon, mabotos hin magkabalag an Senado ngan kongreso, butang nga diri paborable ha Malakanyang, diri la ha ginlalauman hini nga pagriwa han Senado ha mga proposisyon hini, kundi bisan ha kaihaon nga pag-aagian han sugad nga proseso. Gawas hini, an pagtutukod nala han Constitutional Convention an

nahibibilin nga pamaagi agud baguhon an konstitusyon.


Samtang, nakakab-ot hin magkasurunod nga kadaugan an Committee for the Defense of Lawyers (CODAL) ngan iba pa nga kontra-“cha-cha” nga grupo kontra ha igin-susulong nga “people’s initiative” han maka-Arroyo nga Sigaw ng Bayan. Igindaug ha mga Regional Trial Court han Roxas City ngan General Santos City an pagpapalugsong han *temporary restraining order* (TRO) kontra ha “people’s initiative.” Ini nga mga TRO an ulang ha beripikasyon han Commission on Elections ha mga pirma nga natirok kuno han grupo nga Sigaw ng Bayan samtang diri pa nareresolbar han Korte Supre-

ma an karukayaknon. Gidadamui na liwat an nabubuksas ngan napapamatud-an nga peke nga mga pirma.

Dako ini nga ulang ha kunuhay “people’s initiative” tungod nga igintatalaan han konstitusyon han reaksyunaryo nga estado nga rekisitos ha “people’s initiative” an pagtitirok hin beripikado nga pirma han 3% han mga botante ha kada usa nga distrito.

Kadugangan dinhi, waray wantas an kampanya han Catholic Bishops Conference of the Philippines (CBCP) kontra ha “people’s initiative”. Sigon ha pahayag han CBCP hadton Mayo 11, grabe ini nga nababaraka ha ginsugad hini nga nagpapadayon ngan mapanuwat nga kampanya agud mangalap hin mga pirma subay ha “people’s initiative”. Basar kuno ha surbey han CBCP ha mga hurisdiksyon han mga obispo hini, nahibaruan hini nga hiluag an pagriwa han katawhan ha “people’s initiative”.

Kadungan hini, sekreto nga nagmimiting ngan nagpaplano an oposisyon ha Kongreso, kaupod an BAYAN, Bayan Muna ngan pira pa nga kontra-Arroyo nga grupo komo pangangandam ha utro nga kaso hin *impeachment* kontra kan Gloria Arroyo. Ginseseguro liwat nira an katangkuran ngan kadig-unon han ira ranggo. Labot ha mga unob na nga nahiplastar nga ebidensya, nadugngan pa ini han mga ebidensya han CCTA mahiunong ha panlimbong ha eleksyon, panmatay hin mga aktibista ngan iba pa nga pasista nga pangangabuso ngan pagtalapas ha konstitusyon kasumpay han pagpapagawas han Presidential Proclamation 1017, *calibrated preemptive response* (CPR) ngan Executive Order 464. **AB**



Gloria Arroyo, salaan—CCTA

“Salaan!” Ini an desisyon han Citizen's Congress for Truth and Accountability (CCTA) kontra kan Gloria Arroyo. Mga kaso hin panlimbong ngan manipulasyon ha eleksyon 2004, grabe nga korapsyon ngan pagtalapas ha tawhanon nga katungod an iginsalawad kontra kan Arroyo ha CCTA.


An 203-kapaypay nga desisyon han CCTA igin-gawas hini nga Mayo 10. Lima kabulan nga gin-adman han 15-katawo nga lupon han mga huwes an mga ginsumpaan nga asoy han 22 nga testigos nga inatubang ha lima nga pampubliko nga pagbista hadton Nobyembre 2005.

Ha partikular, napamatud-an ha CCTA nga nanlimbong hi Arroyo ngan an iya kapadis nga kandidato nga hi Noli de Castro ha mga probinsya han Cebu, Pampanga, Iloilo, Bohol ngan

ha Autonomous Region for Muslim Mindanao. Gin-gamit liwat niya an mga pampubliko nga pundo para ha iya kampanya; ngan ginpuypoy an pagbubuksas ha iya mga krimen pinaagi han palisiya nga *calibrated preemptive response*, Executive Order 464 ngan Presidential Proclamation 1017.

May sala liwat hi Arroyo ha grabe ngan sistematisiko nga kampanya han pagpatay, pagsikmit, pampolitika nga paglanat ngan iba pa nga pan-aabuso ha tawhanon nga katungod tikang han mangatungdanan hini hadton 2001.

Ginbansagan liwat han CCTA an “cha-cha” komo pinakadako nga iskema ni Arroyo para tahuban an iya mga krimen tungod kay katuyuanan



hini nga konsolidasyon an iya poder, rumkon an bug-os nga oposisyon ngan igpiliw an ngatanan nga karukayaknon kontra ha iya.

Sigon kan anay Bise Presidente Teofisto Guingona, tsirman han CCTA, nagplastar hin walo nga rekomendasyon an CCTA la-kip an hagilayon nga pagresayn ni Arroyo komo presidente para bumaton ha iya mga kasal-anan; panawagan ha pankalibutan nga komunidad nga tanggalan hin suporta ngan pagkilala an peke nga rehimen Arroyo; pagsalawad hin kaso kontra kan Arroyo ha United Nations Human Rights Commission; ngan pagpapawaray-epekto ha ngatanan nga mga mapanmuypoy ngan matalumpiguson nga balaud. **AB**

Rehimen Arroyo, ginkondenar han CBCP

Makusog nga ginkondenar han Catholic Bishops Conference of the Philippines (CBCP) an rehimen Arroyo hini nga Mayo hiunong ha mga diri resolbado nga karukayaknon kasumpay han panlimbong ha eleksyon.

Ha pahayag hini hadton Mayo 11, igin-insister han CBCP ha rehimen Arroyo nga angay na hini klaruhon an iba-iba nga isyu nga ngatanan may-ada sumpay ha panlimbong ha eleksyon 2004 sugad han “Hello Garci” tapes, an gatus-gatos kamilyon kapesos nga ginkurakot tikang ha “fertilizer scam” nga gindududahan nga iginpundo ha kampanya ni Arroyo, an waray pa igsapubliko nga unod han Mayuga report ngan mga anomaliya nga nadadabihan han mga opisyal han Comelec.

Partikular ha “Hello Garci” tapes ngan “fertilizer scam”, igin-insister han CBCP an pagpapadayon han mga gintikangan na nga pagbista ha Se-

nado ngan Kongreso hiunong hini ngan an pagreport han bug-os nga resulta ha publiko. Igin-insister liwat han CBCP nga igsapubliko na an bug-os nga gin-uunod han imbestigasyon nga ginhimo hadton 2005 ni Vice Adm. Mateo Mayuga han Philippine Navy hiunong ha pagkakadabi han higtaas nga opisyal han militar ha huluagan nga panlimbong ha eleksyon 2004 labina ha Mindanao. Sugadman liwat, utro nga igin-insister han CBCP nga igreorganisa an Comelec ngan sirutan an ngatanan nga opisyal nga mapapamatud-an nga nadabi ha mga maanomaliya nga kontrata. Ginkondenar liwat han CBCP an “people’s initiative” tungod kay, sering hini, diri man ini inisyatiba han katawhan.

Tinuyo nga gin-utod han rehimen an mga imbestigasyon ha Senado ngan Kongreso hiunong ha “Hello Garci” tapes hadton katapusan han Enero agud diri na mabuyagyag ha publiko an mga detalye han pan-

limbong hini hadton eleksyon han Mayo 2004. Gintatago liwat han rehimen hi anay Department of Agriculture Undersecretary Jocelyn Bolante, usa ha mga yawe nga personahe nga makakaghatag han detalye hiunong ha iligal nga paggamit ha kampanya pan-eleksyon ni Arroyo ha pundo nga angay igpalit hin abono. An kabug-usan nga resulta han imbestigasyon ni Mayuga nga hadton Nobyembre 2005 pa natapos waray pa liwat igsasapubliko ngada yana. An mga rekomendasyon naman hiunong ha “paglilimpyo” ha Comelec waray pa liwat aksyuni ni Arroyo.

Sering han CBCP, tubtub diri ginlilinaw han rehimen Arroyo ini nga mga karukayaknon, magpapadayon an singbahan Katoliko ha pagkondenar diri la ha kawaray moral nga basaranan han paghahadi han rehimen kundi ha ngatanan nga kaduntan nga nadadabihan han gobyerno nga Arroyo. **AB**



2 M16 nakumpiska ha Negros

Duha nga riple nga M16 an nakumpiska han usa nga tim han Bagong Hukbong Bayan (BHB) kahuman hini atakiha an usa nga grupo han Regional Mobile Group (RMG) han Philippine National Police (PNP) hini nga Mayo 20 ha Barangay Mabini, Escalante City, Negros Occidental.

Duha nga pulis an napatay ha pag-atake. Kaupod hira ha upat-katawo nga tim han 602nd RMG nga nagkita han sarayaw ha barayo. Ginsurprisa hira dapit ala-una han kaagahon han upat nga Pula nga mangaraway. Nagreinpors an iba nga pulis kundi nakaatras na an mga gerilya. **AB**

Ambus ha Isabela

Pito nga sundalo an napatay ngan siyam an nasamaran han gamaan han mga Pula nga mangaraway han Bagong Hukbong Bayan (BHB) an mga tropa han 45th IB giutan han Barangay Ueg ngan Panninan ha San Mariano, Isabela hadton Abril 2.

Tipasakob an mga sundalo ha Barangay Panninan han makita hira han yunit han BHB ha lugar. Ginlanat hira han usa nga tim han mga gerilya ngan naabutan nga namahoway ha usa nga bulod. Dayon pinusisyon an BHB, ginpurusil nira an mga sundalo ngan ginpabuthan hin *rifle grenade*.

Maiha na nga nakaatras an mga Pula nga mangaraway han umabot an reinporsment nga helikopter duha kaoras matapos an agway.

Antes an ambus, duha nga parag-uma ti-kang ha Barangay Ueg an ginsikmit ngan pinan-ngastigo han mga sundalo. Gindid-an liwat han mga pasista nga tropa an mga parag-uma nga kumadto ha ira kaumhan. Ginbantayan nira an ngatanan nga tarabukan ha salog ngan gin-aruan hin sedula an ngatanan nga taghimaryo.

Nagserbe an ambus nga sirot ha 45th IB ha pandarahug hini ha katawhan ha lugar ngan amot han BHB ha pagpadagmit han pagpapabagsak ha rehimen Arroyo. **AB**

10 armas, nakumpiska ha Samar ngan Leyte

Napulo nga armas an nakumpiska han BHB ha mga taktikal nga opensiba hini ha Samar ngan Leyte hini nga Mayo 5 ngan 6, sigon ha pinakaurhi nga mga report tikang ha prente.

Ha Eastern Samar, upat nga riple nga M16, duha nga pistola nga 9 mm ngan usa nga pistola nga .357 an nakumpiska han BHB han ambuson hini an unom nga pulis ha Bonghon, Dolores, Eastern Samar hadton Mayo 6, sigon ha Sergio Lobina Command. Nauna na nga nahireport han AB nga lima nga M16 an nakumpiska ha nasering nga pag-ambus.

Usa nga pulis an napatay ngan duha an nasamaran ha ambus samtang usa an sinurender ngan dinalagan an duha. Gintagan han BHB hin *first aid* an mga samaran ngan gintratar hin maupay an sinurender nga pulis, kabaliskaran ha iginbalita han kaaway.

Ha Leyte, duha nga M16 an nakumpiska han BHB han ambuson hini an mga tropa han 19th IB ha Sandayong, Hibalangan, Villaba hadton Mayo 5. Duha nga sundalo an napatay ngan duha an nasamaran ha ambus nga linastar la hin 15 minutos, sigon ha Mt. Amandewin Command (MAC) han BHB-Leyte Island. Ginpanhimuwa liwat han MAC an iginpasamwak ni Lt. Col. Lope Dagoy han 19th IB nga gintalapas han BHB an mga pankalibutan nga balaud han gerra han sunugon kuno hini an patay nga lawas han usa ha mga namatay nga sundalo. Sigon ha BHB-MAC, nasunog an patay nga lawas han maglarab an gasolina nga dara-dara han mga sundalo ha ira sarakyan bunga han pagkaigo hini ha *command-detonated land mine*.

Sigon pa gihapon ha BHB-MAC, an 19th IB an tinuod nga nagtatalapas ha tawhanon nga katungod tungod ha pagpatay hini kan Jessie Talaboc, usa nga sibilyan nga gintahapan nga Pula nga mangaraway. Hi Talaboc, usa nga residente han Sityo Can-ili, Barangay Donghol, Ormoc City in ginsikmit, gintortyur ngan ginpatay han mga tropa han 19th IB hadton Mayo 7 ngan iginpresentar komo kaswalti kuno han BHB.

Ini in kahuman mapakyas an 19th IB nga makapatay o makadakop hin bisan usa nga Pula nga mangaraway ha reyde hini ha usa nga kampo han BHB ha Sityo Pikas han nasabi nga barangay hadto mismo nga adlaw. Nasamaran, kinalasan ngan nahadlok an mga naatake nga sundalo han manhinbubto an mga *command-detonated land mine* nga igintanom han BHB ha perimetro han kampo sanglit waray na nira lanata an mga Pula nga mangaraway nga nakaatras hin waray kaswalti. Duha nga *blocking force* liwat han kaaway nga ginpurusil han mga isnayper han BHB an waray na liwat umato. **AB**

Interbyu kan Jorge "Ka Oris" Madlos

Nabuylo an rebolusyon ha Mindanao

Padayon nga nakakaamkon hin magrangat nga kadaugan an rebolusyunaryo nga kagiusan ngan katawhan ha Mindanao. Ha pakikighimangraw han *Ang Bayan* kan Kasamang Jorge "Ka Oris" Madlos, tagapagyakan han National Democratic Front-Mindanao, iginpasaro niya nga an rebolusyunaryo nga kagiusan ha isla naglulupgop na ha 19 ha 25 nga probinsya. Naabot na ha 200 nga bungto ngan syudad hini an luggop han 35 nga prente gerilya han BHB.

"Usa nga riko nga isla an Mindanao," sering ni Ka Oris, "kundi mayoriya ha sobra 17 milyon nga populasyon hini an nagkukuri, tiniyupi ngan tinalumpigos han mga higante nga imperyalista nga korporasyon, dagko nga burgesyia komprador ngan dagko nga agaron maytuna."

Diri urusahon, ha sugad, nga makusog pareho an dayag ngan armado nga pag-ato han katawhan dinhi. "Aanhi an lehitimo nga pag-ato han mga Moro pinaagi han MILF ngan MNLF. Mas samwak an pag-ato han katawhan ha pangunguna han PKP-BHB-NDF."

Pagpamatuod hini an 412 nga gudti ngan dagko nga taktikal nga opensiba nga iginlansar han BHB ha Mindanao ha naglabay nga 16 kaban. Pinakadamo dinhi nailansar ha urhi nga parte han 2005. Nakakumpiska an mga Pula nga mangaraway hin sobra 300 nga iba-iba nga klase hin armas. Sobra 300 nga reaksyunaryo nga tropa o katugbang hin usa nga batalyon an namatay ha mga agway. Haros 300 liwat an nasamaran ha ira tropa hini nga panahon. "Naamkon naton ini nga mga kadaugan hin haros waray kaswalti ha aton mga pwersa", dugang pa ni Ka Oris.

Landaw ha mga taktikal nga opensiba an magdinaugon nga pagatake ha unom nga *municipal station* han PNP kun diin nakakumpiska an BHB hin sobra 80 nga iba-iba nga kalibre nga pusil ngan mga

reyd ha duha nga dagko nga detatsment han AFP-CAFGU. Landaw liwat an lima nga mayor nga ambus ngan duha nga espesyal nga operasyon.

Ini an baton han rebolusyunaryo nga pwersa ha Mindanao ha pagdamo han pwersa han reaksyunaryo nga hukbo ha isla. Sigon pa kan Ka Oris, "...ha nakalabay nga pira katuig 70% han tulo nga dibi-syon hini nga nakabase ha Mindanao an gintambak han rehimen Arroyo ha mga prente gerilya han BHB. Kaupod hini nga mga pwersa an Marines ngan Special Forces."

Ha ilarum han Oplan Bantay Laya, naglalansar an AFP ha Mindanao hin mas brutal nga mga operasyon militar ha kabaryuhan ngan hiluagan nga panmatay ha mga lider ngan kaapi han mga lehitimo nga organisasyon masa ngan partido. Sugadpaman, pakyas ini ha pagpugong ha pagbuylo diri la han hiluag nga kagiusan masa kontra ha paghahadi ni Arroyo kundi han komprehensibo nga pagsulong han rebolusyunaryo nga kagiusan ha bug-os nga isla.



"Buhi pa ako"

Pira kaadlaw antes mahitabo an interbyu kan Ka Oris ha usa nga kampo ha Caraga Region hadton urhi nga bahin han Abril, ginpasamwak han AFP an balita nga patay na hiya. Ginpapagawas han AFP nga napatay hiya ha usa nga away ha Paquibato District ha Southern Mindanao; ngan han waray mapamatud-i ginsering nga namatay hiya durot han grabe nga sakit.

Nahingangatawa nga ginpanhi-muwa ini ni Ka Oris ngan nagsering nga "buhi pa ako!" Sering niya, malinaw nga katuyuanan han militar nga talinguhaon nga idemoralisa ngan waugon an mga rebolusyunaryo nga pwersa ngan katawhan pinaagi hini nga mga estorya. Buta an militar ha tinuod niya nga kamutangan ngan nahimumutangan sanglit pati an midya gintalinguha nga gamiton ha pagbiling ha iya. **AB**

Kontra ha RSOT ngan strike operations han AFP ha Northeastern Mindanao

Mahimuon ngan magtarum nga taktika

Hitaas an kaandaman ngan kakayahan pareho han Bagong Hukbong Bayan (BHB) ngan han katawhan ha Front 14 Northeastern Mindanao Region nga pakyason an mga operasyon militar han mga reaksyunaryo nga armado nga pwersa ngan maglansar hin mga taktikal nga opensiba. Bunga ini han naabot nga hugot nga pagkaurusa ha mga prinsipyo ngan diwa han armado nga rebolusyon, kabatiran han mga Pula nga kumander ngan mangaraway ngan hitaas nga bali-tang han militansya ngan ka-dig-on han katawhan ha lugar.

Tikang matindog ini nga prente hadton 1998, diruderetso an nakab-ot hini nga mga kadaugan ha armado nga pakigbisog, pagtitindog hin base panmasa ngan rebolusyon agraryo. Tikang ha pagtikang waray pa mahiagum hin depensiba nga aksyon an anuman nga yunit han BHB dinhi. Anuman nga operasyon han kaaway, anuman kadako an pwersa nga iginpapadara hini, pirme nakakakita hin pamaagi an katawhan ngan BHB agud idiskaril kundi man direkta nga pakyason ini hira.

Ha ngatanan nga agway, kabakyang han mga Pula nga mangaraway tikang ha pangangandam—paniniktik, surbeylans, pag-aandam hin *ambush sites*—tubtub ha aktual nga paglalansar han mga taktikal nga opensiba an mga elemento han milisya han katawhan.

Pag-ato ha mga *strike operation*

Usa nga pananglitan hini an pagpakyas han BHB ha tagdagko



nga operasyon han AFP tikang Marso 2 tubtub 12 nga nagtutumuyo nga tabrugon an mga Pula nga mangaraway ha mga lugar nga may-ada mga operasyon nga paglalaging an PICOP. Inabot ha 500 nga pwersa han Military Intelligence Battalion, 36th IB ngan iba pa nga mga yunit militar an naglansar hin *clearing operations* ha magkahigripid nga haros 20 kabaryo ha gig-utan han Agusan del Sur ngan Surigao del Sur.

Dayon nga ginpangandaman han BHB an pagsakob han dako nga tropa. Gintudlok han mga na-kaasayn nga yunit an mga gin-agian han mga sundalo ngan gin-adman ini agud himuon nga *ambush site*. Ginlubngan ini hin mga *command-detonated land mine* ngan hugot nga ginpasubaybayan.

Tikang ha ligid han haywey tubtub ha mga interyor nga baryo, gin-oberbaran han taghimaryo nga gintudlok komo mga espesyal nga paniktik an mga gios han AFP

ngan makurimot ini nga ginsubaybayan. Ha kada may-ada nakokompirma nga paggios han anuman nga parte han tropa, dayon nga nagdeploy hin usa tubtub duha katim an sentro nga kumand han BHB agud maglansar hin mga operasyon nga harasment. Mga isnayper tim nga ginkokomponer hin upat tubtub lima nga Pula nga mangaraway nga may dara nga magbakod nga riple an ginmanduhan nga dumikit ha mga gin-aagian han tisakob nga tropa. Bunga hini, diri la nga nau-lang han BHB an mga sundalo, nakakagdurot pa ini hin kahibangan.

Usa nga pananglitan hini an operasyon nga harasment nga gin-himo hadton Marso 5 kun diin gin-kaengkwentro han iginpadara nga tim han BHB an ira target nga usa kaplatun han *Scout Rangers* nga tigda nga sinakob ha usa nga sityo ha Surigao del Sur. Syahan nga nakagpabuto ngan nakaposisyon an mga tropa han kaaway sanglit napi-




ritan nga umatras an tim han BHB. Nakasakob ha baryo ngan nagposisyon an nasering nga tropa ha usa nga balay ngan ginhimo nga taming an pamilya didto. Dayon nga ginios an taghimaryo ngan gintalwas an pamilya sanglit nahimo nga bulnerable ha atake han BHB an mga sundalo. Hadto mismo nga kulop, ginkumando ngan ginpabutuhan han mga mangaraway an mga sundalo agud tabrugon hira ha baryo. Duha an dayon napatay ngan nasamaran an iba pa.

Bisan diri pa man nakakasakob an mga tropa han kaaway, nahihibang na hira han mga atake han BHB. Hadton Enero 29, gin-ambus han mga mangaraway an unom nga sundalo nga nagserbe nga *advance scouting team* han 36th IB ha usa nga baryo ha Bislig City. Usa an dayon napatay ngan samaran an iba pa.

Pag-ato ha RSOT

Madinaugon liwat an pag-ato han katawhan ngan han BHB ha mga operasyon han RSOT ha lugar. Tikang Agosto 15 tubtub Setyembre hadton nakalabay nga tuig, naglansar an 36th IB hin mga operasyon RSOT ha lima nga magkahigripid nga baryo ha Surigao del Sur ngan Agusan del Sur. Naglarang an militar nga mag-iiha ha lugar hin tubtub unom kabulan agud makagtukod hin mga kontra-rebolusyunaryo nga *barrio intelligence network* (BIN), makagrekut hin mga elemento para ha CAFGU ngan ha dayuday makagtindog hin detatsment. Ha aktuwal, linastar la hin 45 kaadlaw an mga sundalo antes madinaugon nga napaiwas han katawhan ngan han BHB.

Antes pa man sumakob an mga tropa nga maglalansar hin RSOT, nagpahayag na an katawhan ha lu-



gar han ira pagtipa ha hihimuon nga operasyon militar. Ginpangaro nira an bulig han lokal nga gobyerno, mga institusyon ngan singbahan agud ig-insister an hagilayon nga pag-atras han kaaway.

Sakob han hilaba nga panahon, biktima han pan-aabuso han militar an katawhan dinhi. Pirme nga kabakyang han mga binaydan nga *goons* han PICOP an AFP ha pagruba han ira mga balay, pan-gabot han ira mga pananom ngan pagsunog han ira mga propyedad ha pag-atentar nga palayason hira ha lugar. Sanglit sugad na la an ira pagtipa ha militar.

Hadton Setyembre, sistematiko ngan dagmit nga nahimo an organisado nga ebakwasyon han usa nga sityo ha Rosario, Agusan del Sur pira kaadlaw kahuman sumakob an mga tropa han kaaway dinhi. Ha bulig han singbahan ngan mga lokal nga opisyal, pira kaadlaw nga nagpabilin ha sentro nga bungto an pira kagatos nga pamilya. Dini-ri hira nga bumalik ha ira lugar samtang aada pa an mga sundalo. Kabakyang an iba pa nga sektor, makusog nira nga gindemanda ha meyor ngan iba pa nga higtaas nga opisyal nga hagilayon na nga pagiknon an RSOT ha ira baryo.

Ha usa pa nga panhitabo, tigda nga ginsakob han usa nga platur

han 36th IB an usa nga sityo ha Bu-nawan, Agusan del Sur nga waray mahibarui han taghimaryo. Dayon nga nag-andam an mga mulupyo dinhi agud gumikan ngan kumadto ha kabablayan ha sentro han sityo. Han makita han nasering nga yunit han kaaway nga nag-aandam na nga mag-ebakwet an taghimaryo, dayon hira ginikan. Waray na igdayon han katawhan an ebakwasyon.

Labaw pa nga ginpakusog han BHB an paglalansar hin mga taktikal nga opensiba atubangan han mga operasyon han AFP. Ha pagtikang pa la han mga operasyon nga RSOT, naglansar na hin mga operasyon nga harasment, isnaying ngan mga ambus an mga Pula nga mangaraway agud magdurot hin kahibangan ha militar ngan paatrasan ini hira.

Upat kabeses na nga nakaglansar hin mga operasyon harasment an BHB kontra ha RSOT sakob hini nga panahon. Tungod ha ura-ura nga kahadlok han mga sundalo, nagpabilin na la hira ha mga sentro han ira gintarget nga sityo ngan waray na maglansar hin mga aktibidad ha mga palibot hini. Haros tagpira la kaadlaw an ira pag-ukoy ha lugar antes hira napiritan nga umatras.

Pinaagi han mahimuon nga mga maniobra ngan madig-on nga pag-ato han katawhan, kadungan an marayhak ngan maupay nga paglalansar hin mga taktikal nga opensiba han BHB, napapakyas an mga operasyon han RSOT. Ini nga eksperyensya padayon nga nagpapahitaas ha militansya han katawhan nga labaw nga nagpapaupay ngan nagpapatarum ha mga yunit han BHB. Ini liwat an nag-aandam ha ira ha pag-atubang han mga kasunod nga mga operasyon han AFP. **AE**

Pasidungog kan Daniel Boone Schirmer

Kaaway han imperyalismo ngan sangkay han katawhan Pilipino

Kaurusa han Partido Komunista han Pilipinas (PKP) an iba-iba nga organisasyon ngan indibiduwal ha US, ha Pilipinas ngan ha bug-os nga kalibutan ha paghalad hin pinakahitaas nga pasidungog kan Daniel Boone Schirmer—usa nga tinuod nga patriyotiko nga Amerikano, rebolusyunaryo nga internasyunalista, madig-on nga kontra-imperyalista ngan aktibo nga tag-undong han pakigbisog han katawhan Pilipino ngan han ngatanan nga tiniyupi nga katawhan.

Ginkikilala han PKP an dedikasyon han bug-os nga kinabuhi ni Daniel Boone Schirmer ha pag-ato ha imperyalismo nga US ngan ha pananalumpigos hini ha katawhan han bug-os nga kalibutan. Namatay hi Schirmer ha US hadton Abril 21 ha edad nga 91.

Binulig hi Daniel Boone Schirmer ha pagpukaw, pag-organisa ngan pagpagios ha mga istudyante ngan trabahador hadton dekada 1930 agud ipakig-away an ira mga katungod hadton Great Depression. Nagin kapi hiya han Partido Komunista ha US hiton liwat nga dekada. Hadton 1950, upat katuig hiya nga ginwanted ngan napiritan nga gumios hin sekreto, tubtub nga arestuhon hiya ngan ginpriso han gobyerno han US hadton 1954 ha pungkay han kontra-komunista nga McCarthyista nga isterya. Pagbalik niya ha unibersidad hadton dekada 1960, aktibo hiya nga ginios kontra ha gerra nga agresyon ngan pananakop han US ha Vietnam.

Hadton 1969 ginsurat ni Daniel Boone Schirmer an iya *doctoral thesis* nga gintituluhan nga “Republic or Empire: American Resistance to the Philippine War,” nga ha dayuday iginimprinta komo libro. Nagtutok hin pagtagad an iya *thesis* ha Anti-Imperialist League, usa nga organisasyon

han mga makanasud nga Amerikano nga ginpamunuan han Amerikano nga nobelista nga hi Mark Twain, nga nadiri ha gerra han US agud himuon nga kolonya an Pilipinas ha pag-abri han ika-20 nga siglo. Igininsister niya nga diri poyde igkonsidera han US an kalugaringon hini komo demokratiko nga nasud samtang ginraraugdaug hini an iba nga katawhan.

Ha tradisyon han liga ngan ni Mark Twain, nagin pursigido nga tagdependa hi Schirmer ha pankalibutan nga pagkaurusa nga kontra-imperyalista ngan tubtub ha iya urhi nga gininhawa aktibo niya nga ginsuportahan an pakigbisog han katawhan Pilipino kontra ha imperyalismo, pasismo ngan reaksyon.

Tinuod nga sangkay han katawhan Pilipino hi Daniel Boone Schirmer. Kaupod han iba pa nga Pilipino nga naestar ha US, mga Pilipino-Amerikano ngan iba pa nga progresibo nga Amerikano nga sangkay han katawhan Pilipino, binulig hiya nga tukuron an Friends of the Filipino Peo-

ple (FFP) komo baton ha pag-imponer han pasista nga diktadura ha Pilipinas ha sulsol han US, ngan agud suportahan an kontra-imperyalista ngan kontrapasista nga pakig-away han katawhan Pilipino.

Makurimot niya nga ginsubaybayan an mga panhi-tabo ha Pilipinas ngan nagsurat hiya hin damo nga libro mahitunog ha kamutangan dinhi ngan ha sugad nakabulig hiya ha pagbuksas ha katawhan

han Amerikano ngan ha bug-os nga kalibutan ha pagpapakaniyu-tiyo ni Marcos ha US ngan mga pasista nga abuso han US-Marcos nga diktadura.

Kabakyang han iya mga kaupod ha FFP, signipikante nga nakaamot hi Schirmer ha US ha pagkondenar ha pakikigkonsabuhay ngan suportahan US ha diktadura Marcos ngan resulta hini nakatirok hira hin suportahan para ha pakigbisog nga Pilipino ti-kang ha katawhan Amerikano ngan napakusog an pakigbisog han mga Pilipino nga naestar ha US. Nakabulig an ira trabaho agud maibuksas, mahimulag ngan ha dayuday maibagsak an pasista nga diktadura.

An presensya han mga base militar han US ha Pilipinas yawe nga karukayaknon nga gintutukan ni Schirmer sakob hin tulo kadekada. Nagsurat hiya hin damo nga artikulo ngan nagyakan ha mga rali, simposyum ngan iba pa nga katitirok agud igpa-

“Schirmer...,” *padayon ha paypay 12*

"Schirmer..." tikang ha paypay 11


nawagan an pagrumok ha mga base militar han US ha Pilipinas. Ha makasaysayan nga botos han Senado nga nagtapos ha tunga hin siglo nga pag-eksister han tratado nga nagtutugot ha permanente nga mga base militar han US ha nasud, ginpasidunggan hiya han Senado han Pilipinas komo usa ha mga nangunguna nga impluwensya agud tapuson na an tratado.

Kahuman mabungkag an mga base han US, padayon nga ginkondenar ni Schirmer an kada larang han mga gobyerno han US ngan Pilipinas agud dugang nga talapason han US an Pilipino nga soberanya pinaagi ha pagpadara hin mga mapanginlabuton nga tropa nga pankombat ha nasud ngan pagtransporma ha bug-os nga nasud komo baga-baga base militar pinaagi han magkalain-lain nga tratado ngan kasarabutan pareho han "Mutual Logistics Support Agreement," "Status of Forces Agreement," "Access and Cross-Servicing Agreement" ngan "Visiting Forces Agreement."

An magtarum ngan mag-upay nga ginhikay nga mga sinurat, pamulong ngan iba pa nga mga importante nga amot ni Daniel Boone Schirmer ha pakigbisog kontra ha imperyalismo nga US, ha diktadura nga US-Marcos ngan ha mas makusog pa nga konsabuhay han US ngan han sinunod pa nga mga papet nga rehimen ha Pilipinas nagseserbe yana nga legasiya ngan inspirasyon ha damo nga Amerikano ngan Pilipino ngan iba pa nga rebolusyunaryo ngan progresibo nga pwersa agud igpadayon an pagpapasulong han rebolusyunaryo nga pakigbisog ha kalugaringon nga nasud, igundong an rebolusyunaryo nga internasyunalismo ngan suportahan an mga rebolusyunaryo nga pakigbisog ha iba pa nga nasud. **AB**

Paniniktik ngan panginginlabot han US ha politika nga Pilipino

Matapos an siyam kabulan nga pagkapriso, gin-amin hini nga Mayo han usa nga ahente han Federal Bureau of Investigation (FBI) han US nga iligal hiya nga nagpagawas hin mga sekreto nga dokumento tikang ha iya gintatrabahuan nga opisina han FBI ngan iginhatag ini ha pira nga dagko nga politiko ha Pilipinas. Hi Leandro Aragoncillo, usa nga Fil-Am, hadto anay parag-analisar han mga datos paniktik nga ginkakalapan han FBI mahitungod ha Pilipinas ngan anay tagsagdon militar liwat ha duha nga magkasu-



runod nga bise-presidente han US. Nagserbe liwat hiya nga sundalo han US Marines ha sakob hin 21 katuig. Gin-aresto hiya hadton Setyembre 2005 ha kaso nga pangengespiya para ha pira nga Pilipino nga personahe.

Pero an ungod, hi Aragoncillo usa nga tawuhan han US nga nangespiya ha Pilipinas. Gin-gamit hiya agud mangalap hin impormasyon mahitungod ha nasud nga magagamit ha panginginlabot ha mga internal nga karukayaknon han Pilipinas ha katuyuanan nga atamanon ngan isulong an interes han US. Bisan paman kun an mas nalandaw yana amo an pakikigsumpay niya kan anay presidente Joseph Estrada ngan iba pa nga oposisyunista, diri sekreto nga aktibo liwat hiya nga nakigsumpay ha mga yawe nga opisyal ngan alyado han gobyerno sugad kanda Mike Defensor ngan Cong. Rodolfo Albano han Isabela.

An trabaho ni Aragoncillo para ha US nagkokompirma ha maiha na nga ginhihimo nga paniniktik ngan pagtitirok han US hin impormasyon mahitungod ha mga sensitibo ngan internal nga karukayaknon ngan panhitabo, mga opisyal han gobyerno, oposisyon ngan yawe nga personalidad ha papet hini nga estado.

Ha aktuwal naniniktik an US ha ngatanan nga nasud, pareho ha mga sangkay ngan kaaway hini nga estado. An pangengespiya hini ha Pilipinas, ngan sugadman ha iba pa nga nasud, diri la para hibaruan ngan pag-adman an mga importante nga panhitabo ngan internal nga karukayaknon dinhi. Gin-gagamit han US an natitirok nga impormasyon prinsipal para panginlabutan ngan manipulahon an mga panhitabo ngan karukayaknon subay ha interes hini ngan gamiton nga instrumento ha pag-impluwensya, panunuhol, pagmanipula tubtub pambraso ngan pan-gigipit ha iba-iba nga opisyal o personahe han gobyerno, oposisyon ngan iba pa nga sektor ha nasud.

An mga ginpapahayag nga "pag-aanalisa" han mga opisyal han gobyerno han US ngan bisan han mga opisyal han embahada han US ha nasud mahitungod ha pampolitika nga sitwasyon dinhi nag-uunod (ha direkta o diri direkta nga paagi) hin mga mando, pahimatngon ngan pahimangno ha karuyag mahitabo han US. Mas damo pa an diri iginpapahayag ngan

"Paniniktik..." padayon ha paypay 13

Pangengespiya han US ha kalugaringon nga katawhan

Gin-eespayan han rehimen Bush bisan an iya kalugaringon nga katawhan. Nabuyagyag hini nga Mayo nga kahuman han mga terosta nga atake hadton Setyembre 11, 2001, iginmando ngan iginpatuman han rehimen an hiluagan nga pangengespiya ha katawhan Amerikano pinaagi han paniniktik ha ira mga rekord ha telepono ngan surat-suratay ha *internet*.

Gin-obligar han National Security Agency, usa nga espesyal nga ahensya han paniktik nga nakatutok ha elektronik nga komunikasyon, an tulo nga gigante nga kompanya nga telekomunikasyon ha nasud nga ihatag ha gobyerno an rekord han mga tawag han ira milyun-milyon nga kliyente. Gin-aro liwat hini an impormasyon kasumpay han mga pribado nga surat nga naagi ha mga kompanya. Gin-gamit han NSA ini nga mga rekord agud padayon nga subaybayan an elektronik nga komunikasyon han katawhan ha ngaran han "pagtudlok han posible nga mga terosta nga aksyon."

Hugot nga igindidiri han mga balaud han US an paniniktik ha katawhan hin waray mandamyento tikang ha korte. Agap ngan hiluagan an protesta nga tinapo ha ginbansagan nga pinakahiluag nga pagtalapas ha mga sibil nga katungod han katawhan Amerikano. Gin-iimbestigahan ini yana ha Senado han US. Ginkasuhan na liwat hin pagtalapas ha mga sibil nga katungod ngan pribasiya han mga kliyente hini an AT&T, usa ha mga gigante nga kompanya han telekomunikasyon nga nakigsabot ha NSA. **AB**

"Paniniktik..." tikang ha *paypay 12*

gin-gagamit ha iba-iba nga paagi han panginginlabot han US.

Ginseseguro han US nga "may-ada ini kapot nga alas" mahitungod ha bisan diin nga gapil han reaksyunaryo nga politika. Klaro ini nga nakita ha kaso ni Aragoncillo ngan mga impormasyon kuno nga nakalap niya.

Ha usa nga bahin, gin-gamit han US an pagbubuksas kan Aragoncillo ngan an pagdadabi hini ha kampo nga Estrada agud igpaabat ha ira nga kapot hira han US. Samtang padayon nga gin-aataman han US komo "reserba nga kabayo" hira Estrada ngan iba pa nga reaksyunaryo nga lider ha politika, tinuyaw nga iginbubuksas hini ha rehimen Arroyo an mga impormasyon kasumpay ha kampo ni Estrada.

Ha luyo nga bahin, gin-gagamit liwat han US an nakalap hini nga impormasyon agud tarhugon ngan igbutang ha kawaray-kaseguruhan nga posisyon hi Arroyo. Ginpabay-an han US nga ibuksas ha publiko an sekreto nga report han US State

Department hadton Hulyo 2005, sugadman an report ni Joseph Musso-melli nga hadto *charge d'affaires* (tagdumara) han embahada han US ha Pilipinas. Gintalakay hini nga mga report an mga akusasyon han panlimbong ha eleksyon, korapsyon, pag-aabuso ha poder, bagsak nga popularidad ni Arroyo ngan an maluya kuno nga pag-atubang ha problema han "terorismo" ha nasud.

Komo dugang nga presyur, ginpabay-an han US nga magsarang an mga eru-estorya nga may-ada kapot nga ebidensya an US mahitungod ha kinawat nga karikuhan han pamilya ni Gloria Arroyo. Gin-gamit han US ini nga report para igpaabat ha rehimen nga may-ada ini kapot nga impormasyon nga poyde ikahibang ni Arroyo ngan igduon ha iya "kun hino an tinuod nga hadi." Ha sugad, mas maseseguro nira nga magpapabilin nga sunud-sunuran an presente nga prinsipal nga niyu-tiyu nira ha ira mga dikta ngan makakagpuga hin maksimum nga konsesyon tikang ha iya ha kaupayan han US. **AB**

Nasyunalisasyon han *natural gas* ha Bolivia

IGINPAPAKITA han bag-o nga gobyerno han Bolivia ilarum ni Pres. Evo Morales an determinasyon hini nga hasugon an dalan han pagkatalwas ha imperyalismo. Igindeklarar ni Morales hini nga Mayo 1 an pagnanasyunalisa han industriya han *natural gas* komo kaparte han pagnanasyunalisa ha dayuday han bug-os nga industriya han enerhiya. Pagdumaraon na ini han Yacimientos Petroliferos Fiscales Bolivianos, usa nga korporasyon nga pananag-iya han estado han Bolivia.

May-ada 20 nga langyaw nga kompanya nga nagkokontrol ha industriya han enerhiya ha Bo-

livia, kaupod an British Gas, British Petroleum, ExxonMobil ngan Total. Gintagan hira han gobyerno han Bolivia hin unom kabulan para ha renegosasyon han ira mga kontrata. Hini nga panahon, kukuhaon han estado an 82% han kita han mga kompanya. Ginlauman nga maabot ha \$780 milyon ha 2007 an kita ha produksyon han *gas* tikang \$460 milyon hadton 2005. Kun diri hira maki-kignegosasyon, palalayason ini nga mga kompanya ngan kukumpiskahon an ira mga pananag-iya. Ikaduha an Bolivia ha mga nasud ha Latin America nga may dako nga reserba han *natural gas*. **AB**

Serbisyo sibil, ginbabastos han Malakanyang

GINPAPANMURANGTAN yana han Malakanyang an pinuno han Civil Service Commission (CSC) ngan tsirman han Career Executive Service Board (CESB) nga hi Karina Constantino-David tungod ha mga deklarasyon niya ngan han CESB diri pala maiha nga talapas ha balaud ngan ha interes han sibil nga serbisyo an pira nga desisyon ngan pitad han Malakanyang. Partikular nga gintudlok han CESB an pagtanggap han Malakanyang hadton Setyembre 2005 kan Juan Miguel Luz komo undersecretary han Department of Education (DepEd) kahuman rumiwa hi Luz nga igproseso han DepEd an tulo nga tseke nga nagkakantidad hin ₱15

milyon nga isuruhol kan Cong. Antonio Diaz han Zambales kabalyo han diri niya pagsuporta ha kaso nga *impeachment* kontra kan Gloria Arroyo.

Nahiuna na nga gin-abuyunan han CSC an desisyon han Malakanyang nga tanggalon ha DepEd hi Luz ha luyo han pagriwa dinhi ni David tungod kay kontrolado ni Arroyo an duha ha tulo nga membro hini. Pero hini nga Mayo nagpagawas hin resolusyon an CESB nga nagkokondenar ha kawaray-respeto han Malakanyang ha mga balaud mahitungod ha serbisyo sibil. An CESB amo an ahensya nga nanginginano ha mga namumuno nga posisyon ha nasyunal nga gobyerno ngan mga korporasyon nga

pananag-iya han estado.

Tungod ha pagsupak han CESB ha karuyagon han Malakanyang, ginpananggal ni Arroyo an mga pinabor dinhi kan Luz ngan ginsaliwan hira han mga tawuhan nga tangkod ha Malakanyang.

Ginhihimo liwat ni Arroyo nga inutil an CSC tungod kay diri hini makontrol an pinuno nga hi David. Gintuyo yana nga diri ginbubutangan han Malakanyang an mga nabakante nga posisyon ha CSC tungod nga samtang diri ini kompleto waray poyde desisyunan an CSC. Ginluluto na liwat han Malakanyang an pagtanggap kan David pareho ha CESB ngan CSC.

Lafayette, ginpapabayad, ginpapalayas

IGINREREKOMENDA hini nga Mayo 19 han Rapu-Rapu Fact-Finding Commission nga ginpapamunuan ni Bishop Arturo Bastes han Sorsogon nga papabaydon hin danyos-perwisyo an Lafayette Mining Ltd., usa nga Australian nga kompanya, tungod ha destroso nga igindurot hini ha kalibungan han isla han Rapu-Rapu ha Albay ngan ha panlawas ngan panginabuhi han katawhan didto. Gintukod ini nga komisyon han Malakanyang hadton nakalabay nga tuig.

Sigon ha komisyon, "Iresponsable nga gintikangan han Lafayette an operasyon han pagmimina bisan diri pa human an impra-istraktura para ha proteksyon han kalibungan." Ginyamusan liwat hini an gobyerno Arroyo ha pagpasibaya hini ngan kapakyasan nga igmonitor an operasyon ha pagmimina ha Rapu-Rapu.

Ha ginhimo nga imbestigasyon han Komisyon ni Bastes, napama-

tud-an nga iresponsable nga iginbubuhos han Lafayette ha duha nga sapa an *mine tailings* (hugaw tikang ha pagmimina) nga *cyanide* ngan



iba pa nga nakakahilo nga kemikal tikang ha pagmimina han bulawan. Resulta hini, nagkamatay an mga isda ngan iba pa nga organismo ha palibot han Rapu-Rapu. Nagkamay-ada na liwat hin mga grabe nga sakit an mga tawo nga aada ha palibot hini, sugad han mga sakit ha panit. Mas grabe pa, an hugaw nga tikang ha mina poyde magdurot hin kanser, sakit ha utok, panganak hin diri mga normal nga puya ngan iba pa nga mga grabe nga sakit.


Igin-iinsister han komisyon nga papabaydon an Lafayette hin danyos-perwisyo. Iginrerekomenda liwat hini an pagkanselar ha "environ-

mental compliance certificate" nga nagtutugot ha Lafayette nga magoperasyon ha Pilipinas ngan pagbawi liwat ha mga insentibo nga iginhatag dinhi kaupod an eksemplasyon ha pagbabayad han buhis. Iginrekomenda liwat hini an paghunong han pagmimina ha Rapu-Rapu.

Iginrekomenda han komisyon an dayon nga paghunong han pagmimina han Lafayette ha Rapu-Rapu ngan an pagrebyu han 1995 Mining Act mismo, ha partikular, an mga probisyon hini nga nagtutugot ha pananag-iya ngan pagpapadalaan han mga langyaw han operasyon han pagmimina ha Pilipinas.

Pareho han ginlalauman, dayon nga ginriwahan han Malakanyang ini nga mga rekomendasyon.

An Lafayette amo an usa ha mga syahan nga kompanya nga nagtikang han operasyon han pagmimina tikang igdeklarar han Korte Suprema nga ligal an Mining Act hadton Disyembre 2004.



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyon nga Waray
Tuig XXXVII Ihap 10
Mayo 21, 2006
www.philippinerevolution.org

Editorial

Madugo nga pangin- gintriga, madugo nga panmumuytoy

Malisyoso ngan mapan-uwat an mando ni Gloria Arroyo ha pulisya nga imbestigahan kunuhay an magkasurunod nga pagsikmit ngan panmatay ha mga makamasa nga personahe, lider ngan membro han mga progresibo nga partido ngan organisasyon.

Syempre palabas la ini nga imbestigasyon. Naobligar hi Arroyo nga maghimo hin pakitang-tao nga pitad atubangan han hiluagan nga pagkondenar ha militar ngan ha iya rehimen nga asya an tinuod nga utok ha luyo han waray hunong nga kabangis kontra ha katawhan ngan ira mga progresibo nga pwersa.

Kabakyang han pitad nga "imbestigasyon," nagpapasarang an Malakanyang hin usa nga dako nga buwa: nga an mga biktima han kabangis han rehimen Arroyo, in mga biktima kuno han "pagpupurga" ha ranggo han PKP ngan BHB, ngan gindududahan kuno nga ahente han gobyerno. Kasunod hini, ginsesering nira nga hi Arroyo ngan "duha nga namumuno nga opisyal han Malakanyang nga gin-ngangaranan hin Gonzalez" an target patayon han BHB. Waray pa makontento hini nga mga buwa, igin-

dugang pa nira nga igsusunod na liwat ha mga papatayon an pira nga lider han pampolitika nga oposisyon.

Ungod gud man nga nahingadto na ha pagtatahi hin pantasya an Malakanyang ha desperasyon hini nga tahuban an kamatuoran ngan limpyuhan an kalugaringon ha responsabilidad hini ha panmatay ha gatus-gatos nga progresibo nga aktibista. Malisyoso nga iginbutang-butang ini ha PKP ngan BHB ha katuyuanan nga magsabrag hin intriga ngan pakarauton an rebolusyunaryo nga kagiusan. Gintatalinguha hini nga buhagon an ranggo han nagkakaurusa nga prente nga kontra-Arroyo ngan paluyahon an kagiusan masa nga nagsusulong han pagpabagsak han Arroyo nga rehimen. Ka-

ruyag liwat hini tarhugon ngan maikondisyon an katawhan para ha mas magbangis pa nga panmumuytoy.

Kaparte han madugo nga pangin-
gintriga han rehimen Arroyo an pirit nga pagdadabi ha unom nga representante han mga progresibo nga partido ha Kongreso ha mga kaso hin pagpatay ngan pagsikmit. Nabibirikis man an lohika ngan kulang hin basaranan, pirit nga ginpapagawas



**Mga landaw hini
nga isyu...**

**10 armas, nakumpiska
ha Leyte ngan Samar**
PAYPAY 7

**Interbyu kan Jorge
"Ka Oris" Madlos**
PAYPAY 8

**Daniel Boone
Schirmer, 91**
PAYPAY 11

Mga instruksyon ha pag-iimprenta

1. An **ginsundan nga paypay**, nga eksakto nga kopya han paypay 1 gawas ha mas pus-aw an *masthead* o *logo* in para ha mga nagamit hin *mimeo machine* o nag-iimprenta ha pamaagi nga *v-type*. Gindesenyo ini para diri madali nga mahibang an istensil.

2. Pag-*print* ha istensil:

- a) Ha *print dialog*, i-*check* an **Print as image**
- b) Tanggalon an *check* ha **Shrink oversized pages to paper size**
- k) I-*click* an **Properties**
- d) I-*click* an **Advanced**
- e) Seguruhon nga naka-set ha **100%** an **Scaling**
- d) Ipadayon an pag-*print*

3. Gin-aaghat an mga kasama nga ipaabot ha patnugutan han *AB* an anuman nga problema kasumpay han pag-iimprenta pinaagi han *v-type*. Magpadara hin *email* ha angbayan@yahoo.com